

Plenchi

Bèl a bati

Trin tring tring, yega yega paso nos tin hopi kos na kachete pa komparti ku boso. Nos ta ansioso pa djasabra yega pa kaba pa nos por reuni riba plenchi di skol. Skol a kuminsá drai riba spit mas haltu awor, despues ku a sera konosí, adaptá i aklimatisá. E kalor di e dianan aki ta ekstremo, i ta eksigui masha hopi di nos tur. Especialmente si no tin manera pa baha e temperatura i hasie poko mas kargabel.

Nos ta spera ku poko awaseru lo muha nos tera i asina trese un tiki aliento pa nos matanan i pa e bestianan den naturalesa. E dianan aki mester bebe suficiente, no negligha esei. Ni maske bo no ta sinti set, perkurá pa bebe awa sigur un 8x pa dia. Anto awa, no djus of kòfi. Banda di tur kos otro mester bebe sigur 8 glas grandi di awa tur dia. Esei ta freska bo kurpa i pone bo órganonan traha mas mihó. No kologa paña den higra di solo, ni traha den kurá den higra di solo. Tene kuenta ku e kayente ta hopi extremo i por hasibu malu. Lanta mainta trempa 5 or, of atardi despues di 6 or bo hasi bo tareanan pafó. Pero tur ora sea kouteloso paso bo por haña bishita de esnan dede largu. Korda ku bo bestianan mester di mas awa ku normal, wak nan koi awa regular pa e no seka. Laga e hobennan bai skol ku ekstra awa pa nan porbebe mas regular. SI hinka 2 bòter den frizer anochi, nan por tin awa pa bebe henter dia na skol sin tin mester di buska of warda burt na cooler. Un tiki mas anto e kalor aki lo ta tras di lomba pa nos yama bonbiní na temporada di awaseru.

Un felis fin di siman pa bo i pa otro siman, bendishon.

Den agènda

5 oktober dia di dosente

Fakansi di skol

- **10 oktober pa 14 oktober**
- **19 desember pa 4 yanuari**

Not'é riba bòrchi

Riba plenchi di Br. Rigobertusschool



Portada na Br. Rigobertusschool

Durante apertura di aña eskolar kada dosente a haña turno pa elaborá riba e simia ku nan kada unu ke sembra den kurason di e muchanan i kon kada mucha por kuida i konservá esaki i lague kai den bon tera pa e por duna fruta. Tur dia nos dosentenan ta pasa tur konosementu i sabiduria over na nos muchanan pa asina nan por bira mas sabí, inteligente i por ta hendenan ku ta útil den nos komunidad.

Tambe a pasa un video di e "Parabola di e sembradó ku a sali bai sembra", kaminda por mira kon paranan ta pasa piki e simia, sumpia ta krese stek e simia èts. (Lukas 8 :5 Un sembradó a sali bai sembra.)

A splika tambe e nifikashon di e Parabola segun e muchanan su situashon di bida. E lokual ku nan komo hoben ta haña nan konfrontá kuné kada dia.

Huntu nos ta pidi Hesus pa e sembra den nos ku ta dosente su kurason i ku nos kada un su kurason por ta manera e tera fertil pa risibí e palabra aki i asina sigui sembr'é den kurason di nos muchanan.

Nos ke yuda nan pa nan por tin un futuro briante. Ku hopi speransa nos ke sembra. I konfiando Dios ku e mes lo manda e awaseru pa mua i laga kada simia krese pa duna fruta na abundansia.

Riba roster

Kolegio st. Famia a hasi apertura di su biblioteka di skol. Un danki na tur ku a kopera den esaki. Riba e potretnan por mira paden di e biblioteka.





Mi ta konta

Santa Teresa di Calcuta, deklarashon di 4 di september 2016.



Mama Teresa, manera e tabata wordu yama kariñosamente, a hasi impakto riba tur ku el a topa of ku a tende di su bondat.

Algún dato di Mama Teresa:

- 1. Nase: 26 ougustus 1910**
- 2. Fayese: 5 september 1997**
- 3. Dicho 1:**
Si bo husga hende, bo no tin tempu pa stima nan
- 4. Dicho2:**
No tin bondat grandi, solamente bondatnan chiki yena ku hopi amor
- 5. Dicho3:**
Parti amor unda ku bo bai. No laga niun hende bin i bai sin ku nan ta sinti mas felis
- 6. Nunka mas el a mira su mama i ruman despues ku el a sali kas pa bira un misionario**
- 7. E èrport di Albania, ta karga su nomber: Aeroporti Nene Tereza**
- 8. Na 1979 el a haña Nobel preis di pas. Pero el a pidi pa regalá e sen pa hasi un seremonia festivo, na pobernan na India.**
- 9. El a biaha bai den un zona di guerra pa salba 37 mucha ku tabata na frontera di guerra.**
- 10. El a gana masha hopi premio pa su trabou inkansabel di yuda pobernan, enfermonan i moribundonan.**

Mucha djispou

Jadira ta bai bishitá su yufrou ku ta malu den hospital. Manera palabrá el a sali i app su amigunan di klas pa bisa nan kon ta ku yufrou.

Jadira: “Ma kabe sali hospital aworaki”

Jason: “Kon ta ku ne”

Shahaira: “E ta hopi malu?”

Jadira: “Hopi ferfelu”

Jason: “Dikon e ta asina malu?”

Shahaira: “Grave?”

Jadira: “E ta bin skol otro mañan kaba.”